

ԲԵՆԻԿ ՎԱՐԴԱՊԵՏԻ ՔԱՐՈՉԸ

(Արտասանված հոկտ. 13-ին Վանքի տաճարում)

«Ո՛չ գրով, այլ հոգով, զի զիրն սպանանէ, այլ հոգին կեցուցանէ»:

Գորնթացոյ Բ. 3—6.

Տիեզերքի Տիրոջ, յաւիտենական ճարտարապետի ձեռքը գեղեցիկ էր կերտել այն երկիրը. նրա հիմքը դրել էր շորս մեծ գետի ակունքների վրա, նրա շուրջը ասեղ լեռների շարքեր շարել, որ պար բռնած, թև թևի, թիկունք թիկունքի տուած հսկաների նման պահապան կանգնեն այն մարգարտաթաւալ ակունքների վրա, գրկեն նրանց հովիտները բազկատարած գրկով, որ շար հողմերը շարշաւեն, մրրիկները չը խուժեն նրա ալւան ծոցը, որ դաժանութիւնը չը թունաւորէ նրա մեղմ ու անոյշ օդը: Հօօր ճարտարապետի մուրճը լեռների լանջերը բացել, բիւրաւոր կշկշան աղբիւրներ էր քաշել նրանց սալնքներից, որոնք կաքաւների գըւզընցով վազում են դէպի դաշտ ու հովիտ՝ գովութիւն փոխուլ:

Նա լի բռներով իր ձեռքի առատութեան եղջիւրից թափել-թափել, լցրել էր լեռ ու հովիտ, դաշտ ու դուրան պէս-պէս՝ նուշ ու անուշ պատուհներով, կենդանութեան անսպառ հացով:

Պահ մի ճարտարապետն իր մուրճը դրել, նկարիչն իր վրձինն է առել ու լերկ լեռները կանաչ վերարկուով, անտառների ճոխ վարսերով զարդարել, երկրի երեսը բիւր երփներանգ ծաղիկներով զուգել, որոնց բոյրն՝ իբրև անուշութեան խուճկ ու կընդրուկ՝ բարձրանում է դէպի վեր, դէպի ջինջ եթերքը, դէպի Ստեղծագործողի աստղավառ ապարանքը:

Այս այն երկիրն է, ուր մեր նախնիք իրանց բոյնը հիւսեցին, այս Եղեմի դրախտն է, հայ բանաստեղծի խնկած «Հայաստան, երկիր դրախտավայր, դու և բնիկ իմ հայրենիք»:

Այս հողն ու շուր, բնիկ հայութեան այս բուրաւէտ որորանը անդրանիկ ու հօօր կապն եղաւ հայ հոգիների մէջ, հայկական միութեան էն զօրեղ գրաւականը: Եւ սիրած ու պաշտած հայրենիքի ծոցում հայն իր քաղաքական կեանքի, կենսակրթութեան կրօնքի, լեզուի հիմքերը դրաւ, որոնք ոսկեղէն շղթաներով էլ աւելի ամուր կապեցին հային հայրենիքի հետ:

Բայց այն որ դրախտն է, որի պարխուպների տակ, որի թաւուտների մէջ դարանակալ օձը, եսականութեան ու նախանձի թոյնը բերնում չի սողում: Արևելքի ու Արևմուտքի հօօր ազգերն իրանց ժանտ հայեացքը, իրանց աչքը յառեցին այն թանգագին մարգարտի վրա, որ Հայաստան էր կոչվում. ու դարբերով բանակ բանակի ետելից, Սևանայ շարան-շարան մութ ամպերի նման իջան մեր աշխարհ իրար ձեռքից

խելու այն մարգարիտը, նրանով իրանց
փառքի բարձունքը, իրանց թագի պսակը
զարդարելու: Եւ այդ պատերազմների ար-
նաներկ դաշտերում ոտնատակ եղաւ Հա-
յաստանը, շէնն՝ անշէն, ապամն անապատ
դարձաւ, բոյսն ու ծաղիկ նրանց ձիանց
սիրակների տակ չորցան:

Հայ քաղաքական կեանքի հիմերը շարժե-
ցին բռնաւորները, բայց այս դեռ կործան-
ման անեղ ահաւորութիւնը չէր. ոչ մի ազգ
արեան գետերով չի տարվել դէպի անդունդ-
ները, արեան ծովում չի խեղդվել: Առաւել
վասնգաւոր են այն ժանա գործիչները, ո-
րոնք մի ազգի հողին են թունաւորում, ո-
րոնք բութ դանակով, առանց արիւն վօթե-
լու, հողիների միութիւնն են խզում: Կու-
զե՞ս մի ազգ քաշել դէպի յաւիտենական
մոռացութիւնը, դէպի անդունդը, կարտէ
նախ նրա կրօնական կապերը: Ամենայն
բարձր տենչանք, ամենայն ոգևորութիւն, որ
մարդու հողին դէպի վեր է քաշում, լինի
հայրենասիրութիւն, լինի որդեսիրութիւն,
լինի փառք, լինի հաւատ, լինի գիտութիւն,
կրօնական զգացմունք է, կապերից հզօ-
րագոյնը մի ազգի որդոց հողիների մէջ:

Եւ օտարների կրօնքը, շաստուածները
ծպտեալ հագուստով մուտք գործեցին Հա-
յաստան, անարիւն պատերազմ յայտարարե-
ցին հայ կրօնքին, կործանեցին նրա բազին-
ները հայ սրտերում և իրանք տեղը նստան:
Հայն արհամարհեց իր տենչանքներն, իր
կրօնքը, պաղեցաւ իր աստուածներից և օ-
տար աստուածների գիրկն ընկնելով նրանց
ներշնչումներով օտարին մօտեցաւ սրտով:

Օտար ներշնչումները, օտար սատանան
փորձութեան ենթարկեցին հային և քաղաքա-
կան աստարիզում փառասէրների հողին գո-
ղանալով՝ օտար դիրքեր, օտար ոսկի, օ-
տար ճոխութիւն, օտար փառք առաջարկե-
ցին միման մէջ հայ նախարարներից շատե-
րին, որոնք իրանց պարտքերը մոռանալով՝
բռնութեան մտրակով դաղեցին իրանց հէզ
ժողովրդին, ուծացան իրանց երկրից, ը-
բոստացան իրար դէմ, արհամարհեցին հայ
թագաւորներին և ընդհանուր պառակտում
առաջ բերելով մայր հայրենիքում՝ քաղա-
քական անկախութեան համար գերեզման
պեղեցին: Օտար դիւանագիտութեան օձա-
շունչ ներշնչումներից Մայր Հայաստանը իր
խսկ ծոցից մանր ու խոշոր օձեր ծնաւ, դա-
ւադրութեան գարշ հերոսներ, որոնք հայ
կեանքի վրա ամօթանքի մուրը քսեցին:
Այդ օձերի թոյնից թունամահ ու թաւալ-
գլոր ընկան արիւնները, ընտիր հայերը, որ
լուսացող պսակն էին հայոց փառքի:

Օտար շունչը, օտար խորշակը փշեց և
հայի դէմքին, բերնի մէջ անդամալոյծ
դարձնելով նրա լեզուն. թէև մեզ անծանօթ
միութեան մէջ, բայց նշմարելի է, որ հի-
նաւուրց հայը իր գիրն ու գրականութիւնն
է ունեցել, իր ոսկեղէնիկ կապը ազգային
միութեան: Բայց ինչպէս՝ չը գիտենք, դե-
ւերը գողացան այն գիրն ու հայի ձեռքը
օտարի գիր տուին:

Այս տխուր վիճակի մէջ էր Հայաստանը
IՎ դարում, իր քաղաքական անկման ճան-
բէն բռնած, երբ քրիստոնէութիւնը վրա
հասաւ մեծ կուսաւորչի ձեռքով: Քրիստո-
նէութիւնը, որի բարոյական ներշնչումնե-
րին կարօտ էր հայը, հեռացուց օտարներից
հայու սիրտը պահ մի, բարոյական միու-
թիւն ստեղծեց հայ ազգի մէջ, բայց նա
իր հիմունքները ազգային հողուն վրա չը
դրաւ. նա աջ ու ձախ կործանեց, ինչ որ
հային կարող էր յիշեցնել նրա անցեալը.
Նրա յաղթական դրօշը ազգային անապատի
վրա փողփողեց:

Հայը գիր շունէր, որ իր գրով Աւետա-
րան կարդար. և ահա սև ճարեկներու ե-
րամներով Յունաստանից՝ յոյն, Ասորիքից՝
ասորի քահանաներ ողողեցին Հայաստան ի-
րանց գրով ու դպրութեամբ ուսուցանելու
հայ մանուկներին, իրանց լեզուով տարա-
ծելու Քրիստոսի Աւետարանը: Դրանք ա-
ռաքեալներն էին աւելի շուտ իրանց տէ-
րութիւնների, քան քրիստոնէութեան. մի
ազգ կործանելու համար դիւանագէտի ձեռ-
քին ամենալաւ միջոցը կրօնքն է: Կրօնքի
պատրուակով որոշ քաղաքական դաւանանք
արագապէս է հաստատվում: Եւ յոյն ու ա-
սորի քահանաները աջողութեամբ պիտի
պսակէին իրանց առաքողների յոյսերը հա-
յոց լեզուն սպանելով ու հայութեան ար-
մատը բրելով, եթէ հայ հանճարը չը վառ-
վէր ու չը լուսաւորէր նրանց բերած խա-
ւարը մեր երկիր:

Անդունդի բերանում հայ միտքը, զգաց-
մունքը, կամքը առաջ մղեց Պարթև Սահա-
կին, շնաշխարհիկ Մեսրոպին, որոնք հողու
տազնապով հայ գիրն ստեղծեցին: Ռահ գե-
տի ափերին, ուր հայ թագաւորն ու նա-
խարարներն իրանց զօրքով, հայ հայրապետն
իր կրօնական դասով, հայ ժողովուրդն իր
միլիոնաւոր բազմութեամբ ընդ առաջ ել-
նելով իր աննման վարդապետին հայ գիրն
ընդունեց, այդ օրը հայի փրկութեան, ազ-
գի ազատութեան արշալոյսն էր տօնվում:
Հայոց գիրը ծնող մայրն է հայ հողիների
միութեան. Ռահ գետի վրա այդ միութիւնն
էր տօնում հայ ազգն իր լրութեամբ:

Հայոց գիրը լոկ տառ չէր, այլ հողի. նա
հայ հողուց, հայ վսեմ տենչանքներից էր
բղխել. նա հողի էր, զօրութիւն: Իսկ ինչ
հողի է, այն հրաշալիք է, աստուածային
շողն երեսին, կնիքը վրան:

Եւ հողեղէն գիրը հրաշք գործեց. հայացի
դաստիարակութեամբ սնված ս. թարգմա-
նիչների խումբը հայացի կազմակերպեց

ազգային եկեղեցին, նրա հիմերը ազգի հոգևոր միութեան ու տենչանքների վրա հաստատելով: Յոյն և ասորի քահանաները, որպէս հրեշտակներից հալածական սև զնդեր, զրկեցին իրանց Աւետարաններն ու քաշվեցին հայոց աշխարհից: Օտար դիւանագրտութեան թակարդները խորտակված էին և նրանց ցանցերի մէջ ընկնելու մօտիկ հայն ազատված:

Սերը դիւանագրտութեան երեսից դիմակն է ընկնում, այնտեղ կոպիտ ոյժի սուրն է շողում. և շողաց պարսից անեղ սուրը հայոց գլխին Աւարայրի դաշտում. բայց «նչ սուր, ո՛չ հուր, ո՛չ հրեշտակ, ո՛չ մարդիկ», ո՛չ արեան հեղեղ անկարող եղան քանդել հայոց ազգային եկեղեցին, որ միութեան կապն էր, հայու հաւատի ամուր խարխիւը, ո՛չ լսեցնել նրա գողարիկ լեզուն, որ հոգեղէն, հօգիացած գրից թափ էր առել, ո՛չ բեկանել նրա յոյսը, որ զրով ուսած գիտակցութիւնից էր ճառագայթել:

Եւ հայը իր գլխին եկած բոլոր խժժուութիւնների մէջ հոգեշունչ զրի սուրբ զօրութիւնով պահեց իր հոգու անկախութիւնը, իր կեանքը:

Գրի տօնը հայոց կեանքի տօնն է, ազատութեան մեծ տօնը:

Հայ ազգ, շնորհաւոր լինի քեզ քո կեանքիդ, քո անմահութեանդ վերջին 1500-ամեակը:

Բայց վայ այն ազգին, անխրատ ազգին, որ միայն իր անցեալով է պարծնում, որի ներկան մտայլ ու մշուշ, որի գիրը խաչի նման փրկութիւն էր միայն անցեա-

լում, իսկ ներկայի հաւար միայն զայթակղութիւն. «Ո՛չ զբով, այլ հոգով, զի գիրն սպանանէ, այլ հոգին կեցուցանէք»: Միայն հոգիացած գիրն է փրկում, անհոգի գիրը լոկ տառ է և մահու գործիք:

Մինչև այժմ թև առած միտքս անցեալի որոններում էր սաւառնում. նայում եմ վար դէպի ներկան ու ծալվում են թևերս, ծալվում են նետահար թռչնի թևի նման, որ վար է զլորվում: Այժմեան հայոց գիրը Մեղրոպի հոգիացած գիրը չէ, այլ լոկ տառ, եղջիւրաւոր ասեղութեան գօրծի, հայոց միութեան սրբազան կապը խողոզ դանակ, մանր ու խոշոր դաւալրութեանց թակարդ իրար դէմ, պարսաւագիր, զիր մեռելութեան, այլ ո՛չ կեանքիւ Եւ անա տեսնում եմ հեռու մթան մէջ՝ գալիս են, նորէն Հայաստան գալիս յոյն և ասորի քահանաները իրանց Աւետարանները գրկած:

Եւ Ե. օսկեղէնիկ դարու բարձունքից ս. Սահակն ու Մեղրոպ խլուր հայեացքով, Ռահ գետի ափերին հայկական հոգիների միութեան հիմնադիր հյուսթիւնը այրող փառասանքով մեզ են նայում: Նրանք հարցնում են մեզ, հայ բանաստեղծի բերնով հարցնում ու պատասխան սպասում. Հայեր, «Ազգերիս մէկ, լեղունիս մէկ, հաւատնիս մէկ, հայրերնիս մէկ, հայրենիքս մէկ, փառքերնիս մէկ, ինչ՞ու չըլլայ սրտերնիս մէկ»:

Ինչու, ինչու, հայերս վառեցէք ձեր խղճատանքի լապտերն ու գնացէք պատասխան տալու: